


Fwencuengh Siengcouh

□ Godoq comz hoiz



▲ Vunz rogguek hix maij daeuj yawj doiq fwen.

◀ Gyoengq canghfwen eu Fwencuengh daengz rogguek.



▲ Fwencuengh bae rogguek yienjok ndaej ciengj.



▲ Song boux canghfwen cingq doiq fwen.



▲ Gyoengq dahsau Boux-cuengh neix hix maij eu Fwencuengh.

Fwencuengh dwg cungj go Bouxcuengh vunzbiengz gingciengz dingqnyi haenx, hix dwg cungj go vunz Bouxcuengh ceiq gyaemaij ndeu. De dwg cungj vwnzyoz ndawbiengz Bouxcuengh ndeu, hix dwg aen bouhfaenh gyoebbaenz sei Cunghvaz ndeu.

Fwencuengh coenz dinj "ndang" iq, ndawde gamjcingz caensaed, sing fwen ndeidingq. Fwencuengh ciuq doenghgi daegdiemj singmeh yinh-meh singdiuh Vahcuengh daeuj nda coenzfwen, cauhaenz cungj sibgvenq nda sing coq cih couhdwg gizlawz nda cih singraez gizlawz nda cih singdinj, yinhmeh baenzlawz aeu ndaej dox-boiq, coenz fwen miz geijlai cih caeuq aeu geijlai coij daengj, cungj sibgvenq gagmiz neix hawj Fwencuengh miz daegsaek Bouxcuengh noengznaz dangqmaz.

Fwencuengh Siengcouh miz doxdoi eu, doengzcaez eu, gag eu daengj lai cungj. Baez daengz seiz vunz guh hawfwen, doxcomz eu fwen, doxdax eu fwen, cungj miz canghfwen dangseiz cau fwen, dangseiz eu fwen, boux cam boux han, aj bak baenz fwen, vahcoenz ndeiriu, ok fwen youh vaiq youh ngamjdeng, neix

gingciengz hawj bouxdingq rihaha bae. Gyoengq canghfwen Fwencuengh Siengcouh ceiq maij doxdoi eu, cungj fuengsik doxdoi eu neix hix ceiq miz daegsaek, hix heuhguh doiq fwen, beij fwen, doxdax; ndawde miz haujai doxdingz doxbuek, doxdax, maezvunz caeuq ndei yawj dangqmaz. Fwencuengh Siengcouh dangguh cungj vwnzyoz ndawbiengz ndeu, couh miz gyaq vwnzyoz sang raixcaix.

Youq Siengcouh Yen, mbouj-guenj youq ndawsingz roxnaeuz lajmbanj, vunz lai cungj gyaemaij Fwencuengh. Baez daengz ngoenz-ciet, guh laeuj couxbawx haqlwg, guh hoihmiuh, gvaq ngoengzseng, haeuj ranzmoq daengj doengh ngoenz guh saeh'angq, vunz lai cungj gyaem eu Fwencuengh. Youq bingzseiz, mbouj-guenj youq vwnzva gvangjicangz, gyauejgiuz, gunghyenz ndawsingz, roxnaeuz youq gyang haw gyauej haw ndaw yanghcin, roxnaeuz youq ndaw naz henz reih lajmbanj, cungj ndaej-nyi vunz eu Fwencuengh sing raez ndeidingq. Vunz lai Siengcouh gyaemaij eu Fwencuengh guh'angq, hix baengh Fwencuengh guh gizgyaeng haw ganbu ginzcong hag caeuq cienz doenghgi fuengcim cwngecwz dangj

raeuz. Vunz lai Siengcouh guh vwnzva hozdung ndawbiengz caeuq gvaq saedceij, cungj ndek mbouj ndaej Fwencuengh lo.

Bi 2010, Fwencuengh Siengcouh ndaej Gvangjsih Bouxcuengh Swcigih Yinzminz Cwngefuj doengzeiq, ndaej lied haeuj daihsam buek swcigih gaep feihvuzciz vwnzva yizcanj mingzloeg.

Bi 2011, bi 2012 Gvangjsih Densidaiz (dangseiz baenzneix heuh, baihlaeng doxlumj) gicej song baez daengz Siengcouh Yen Majbingz Yangh guh aen cezmuiz ingjsiengq Fwencuengh Siengcouh, liuxle youq Gvangjsih Densidaiz book. Bi 2013, Majbingz Yangh ndaej Gvangjsih Ginzcong Yisuzgvanj, Gvangjsih Fwencuengh Sanhgoh Cungvei soengq hawj aen cwnghueh "Guengjsae aen mbanjranz Fwencuengh".

2018 nienz 9 nyied 13 hauh, gyoengq canghfwen Fwencuengh Siengcouh bae daengz Ngolzozsw Fuzlahdizvozswdohgwz camgya yienjok, yienj aen cezmuiz Fwencuengh Siengcouh 《Cungguek Ngolzozsw Vwnzva Doxgyau》 caemhcai ndaej gaiq ciengluengz ndeu. Baez neix yienjok le, couh hainduj hawj Fwencuengh Siengcouh ndaej hwnj daizheiq seiqgyaiq lo.



▲ Gyoengq bouxyawj eu Fwencuengh lai dangqmaz.



▲ Vunz rogguek maij Fwencuengh lai couh caeuq canghfwen hab'ingj.



▲ Angqvauvau doxgyau Fwencuengh.